



KTV
Berat BICAJ
Drejtor
Prishtinë

Ref:1912/1413/KPM/mf

VENDIM

Lidhur me Ankesën nr. 2019/85-Familja Istogu.(Palë Ankuese) kundër KTV (“Palë Përgjegjëse”)

Faktet

1. Komisioni i Pavarur i Mediave (KPM) ka miratuar Kodin e Etikës për Ofruesit e Shërbimeve Mediale në Republikën e Kosovë KKPM-2016/3, i cili ka hyrë në fuqi më 11 tetor 2016. Me Kodin e Etikës KKPM-2016/03 janë përcaktuar rregullat e sjelljes dhe të punës së shërbimeve mediale audiovizuale në pajtim me dispozitat ligjore që janë të domosdoshme në një shoqëri demokratike.
2. KPM me datën 30 shtator 2019, ka pranuar një ankesë nga Familja Istogu ndaj kronikës *"Familja Istogu kërkon azil në Suedi për djalin e sëmurë"* të transmetuar me datën 03 shtator 2019 në edicionin e lajmeve Interaktiv të orës 19:00 në KTV. Pala Ankuese pretendon se me transmetimin e kësaj kronike: *"Pala Përgjegjëse e ka bërë pa autorizimn e familjes për çfarë kjo familje është ndier e thyer moralisht dhe psikikisht si dhe i është shkelur privatësia, duke i zbuluar të dhëna personale, gjendjen nëpër të cilën ka kaluar dhe është duke kaluar familja dhe se kronika e transmetuar në një televizion suedez, ka qenë e autorizuar nga familja e jo të shfaqet edhe në ndonjë medium tjetër"*
3. KPM me datën 1 tetor 2019 përmes një shkrese e ka njoftuar Palën Përgjegjëse për ankesën e pranuar nga Pala Ankuese dhe ka kërkuar sqarim brenda tre (3) ditësh lidhur me pretendimet e ankesës.
4. KPM me datën 4 tetor 2019 ka pranuar një përgjigje nga Pala Përgjegjëse, duke pretenduar se kronika në fjalë është realizuar bazuar dhe përkthyer në materialin e televizionit suedez, STTV dhe se qëllimi i raportimit ka qenë i mirë me idenë që mund të ndihmojmë kauzën për vazhdimin e qëndrimit të foshnjës në Suedi për të marr trajtimin e duhur mjekësor. Ndërsa sa i përket materialit të transmetuar Pala Përgjegjëse thekson se nuk kanë hasur askund se ky material mund të transmetohet vetëm në Suedi. Po ashtu ka

shprehur keqardhje nëse me transmetimin e kësaj kronike mund të kenë shkaktuar shqetësim tek Pala Ankuese.

5. KPM ka analizuar ankesën e Palës Ankuese si dhe ka monitoruar kronikën e lartpërmendur dhe në bazë të Raportit të monitorimit të datës 15 tetor 2019 ka gjetur se Pala Përgjegjëse ka vepruar në kundërshtim me Kodin e Etikës KKPM-2016/03.
6. KPM, pas të gjeturave nga Raporti i monitorimit, me datën 29 tetor 2019 i ka dërguar Palës Përgjegjëse Njoftim për Shkelje me të cilin e ka njoftuar për shkeljet e bëra dhe i ka kërkuar të vepronte në pajtim me Kodin e Etikës KKPM-2016/03.
7. KPM me datën 31 tetor 2019, ka pranuar edhe një përgjigje nga Pala Përgjegjëse, përmes të cilës e pranojnë se mund të kenë bërë shkelje të Kodit të Etikës, me përmendjen e emrit të sëmundjes së djalit të Palës Ankuese mirëpo pretendojnë se materialin e transmetuar e kanë marr nga televizioni suedez.

Analiza Ligjore

8. Komisioni bazuar në të gjitha faktet dhe analizat e lartpërmendura konstaton se Pala Përgjegjëse, është gjetur në shkelje të nenit 7, paragrafi 1, të Kodit të Etikës KKPM-2016/03.

Neni 7, paragrafi 1, i Kodit të Etikës KKPM-2016/03 përcakton se:

“E drejta e privatësisë së individëve duhet të respektohet. Ndërhyrja në çështjet thjeshtë private apo personale të cilat nuk kanë ndikim në interesin publik është e ndaluar. Ata që janë prekur nga tragjedia apo pikëllimi duhet të trajtohen me ndjeshmëri, respekt dhe maturi duke e respektuar privatësinë e plotë të tyre.”

9. KPM, me qëllim të vlerësimit të pretendimeve ankimore të Palës Ankuese ka bërë monitorimin e Palës Përgjegjëse dhe në bazë të Raportit të monitorimit të kronikës së transmetuar ka gjetur se Pala Përgjegjëse me datën 3 shtator 2019 në edicionin e lajmeve Interaktiv të orës 19:00 ka transmetuar të dhëna të ndjeshme, përkatësisht të dhëna rreth gjendjes shëndetësore djalit të Palës Ankuese në kronikën *“Familja Istogu kërkon azil në Suedi për djalin e sëmurë”* duke vepruar kështu në kundërshtim me nenin 7, paragrafi 1 të Kodit të Etikës KKPM-2016/03.
10. KPM bazuar në të gjeturat e monitorimit, analizimin e ankesës së Palës Ankuese dhe përgjigjen e Palës Përgjegjëse, ka gjetur se Pala Përgjegjëse ka bërë shkelje të Kodit të Etikës KPM-2016/03, gjatë transmetimit të kronikës *“Familja Istogu kërkon azil në Suedi për djalin e sëmurë”*.
11. Komisioni duke u bazuar në faktet dhe analizat e lartpërmendura, konstaton se Pala Përgjegjëse ka bërë shkelje të nenit 7, paragrafi 1, të Kodit të Etikës KKPM-2016/03.

